

**Iluarsiissut**

Siunnersuut 16. august 2024-mik ullulerneqartoq taarserpaa  
(Inatsisinut periutsini oqaaseqaatit malitsigisaannik § 3-mi, imm. 5, § 10-mi, imm. 1, § 22-mi,  
imm. 2 aamma § 30-mi, imm. 2 annikitsunik iluarsiiffigineqarput.

**Uunga siunnersuut:****Filmiliortarneq pillugu Inatsisartut inatsisaat****Kapitali 1***Atuuffia aamma taaguutit*

§ 1. Inatsisartut inatsisaat atortinneqarpoq Kalaallit Nunaanni filmiliortarnernut aamma piareersaasiortarnernut siuarsaanernullu kalaallit filmiliaannik Kalaallit Nunaanni nunattalu avataani. Filmiliornertut paasineqassapput ataatsimut isigaluni filmiliassamik piareersaasiorneq, filmiliorneq aamma filmiliamik suliareqqiineq.

§ 2. Filmitut paasineqassapput Inatsisartut inatsisaat naapertorlugu assilissat uummaarissut - uumassusillit qanorluunniit ittut, apeqqutaatinnagu immiussinerup takutitsinerullu qanoq ittueneri, tamatumani filmitut assilissat aamma video atorlugu sanaat, kisianni tv-kkut aallakaatitassiaanngitsut.

§ 3. Kalaallinit filmiliatut paasineqassapput kalaallimik ataatsimik arlalinnilluunniit producenteqarluni suliat, annertunerusutigullu kalaallit oqaasii atorlugit immiunneqarsimasut imaluunniit eqqumiitsuliornikkut teknikkikkulluunniit suliaasut Kalaallit Nunaanni filmiliortarnermik filmimullu kulturimik siuarsaasut, taamaattoq tak. § 4, imm. 2.

*Imm. 2.* Nunani allamiunit filmiliatut paasineqassaaq filmi kalaallit filmiliarinnngisaat.

*Imm. 3.* Kalaallisut filmiliortutut – producentit paasineqassaaq:

- 1) inuk danskisut innuttaassusilik Kalaallit Nunaannilu najugaqartoq,
- 2) aktiaatileqatigiiffik imaluunniit piginneqatigiiffik Kalaallit Nunaanni nalunaarsorsimasoq, tassanilu pisortanut ilaasut aamma siulersuisuni ilaasortat amerlanerussuseqartut danskisut innuttaassuseqarlutillu Kalaallit Nunanni najugaqassapput, imaluunniit
- 3) ingerlatseqatigiiffik alla Kalaallit Nunaanni angerlarsimaffeqartoq suliffeqarfik nr. 2-mi eqqaaneqartumit killeqartumik akisussaasuusoq, matumani aamma aningaasaateqarfiit imaluunniit peqatigiiffiit, qullersaqarfimmi ilaasortat amerlanerussuteqartut imaluunniit siulersuisut amerlanerussuteqartut danskisut innuttaassuseqartut aammalu Kalaallit Nunaanni najugaqartut,

4) aktiaatileqatigiiffik imaluunniit piginneqatigiiffik, filiaaleqartoq nalunaarsorsimasumik Inuussutissarsiornermut Ingerlatseqatigiiffinnullu Aqutsisoqarfimmi – Erhvervsstyrelsen-imi, imaluunniit ingerlatseqatigiiffik alla killeqartumik akisussaaffeqartoq, ingerlatsivimmi pineqartumi aqutsisuusoq danskisut innuttaassuseqarpat Kalaallit Nunaannilu najugaqarluni, imaluunniit

5) ingerlatsivik Namminersorlutik Oqartussanit pigineqartoq ingerlanneqartorluunniit, imaluunniit kommunimit kommuninilluunniit arlaqartunit.

*Imm. 4.* Filmiliortut - producentit nunani allamiutut paasineqassaaq filmiliortoq kalaaliunngitsoq.

*Imm. 5.* Naalagaaffimmi innuttaanermut piumasaqaat, imaluunniit najugaqarfik imaluunniit angerlarsimaffik imaluunniit Kalaallit Nunaanni nalunaarsorneqarsimaneq, imm. 3, nr. 1-4 naapertorlugu atorunnaassaaq nunat tamalaat akornanni isumaqatigiissutikkut Kalaallit Nunaat isumaqatigiissuteqarsimappat tapersiisimappalluunniit taamatut piumasaqaammut.

**§ 4.** Filmiliaoqatigiinnertut paasineqassaaq filmiliaq nioqputissiarineqartoq suleqatigiinnikkut nunani allamiumik allamiunilluunniit arlaqartunik peqateqarluni, minnerpaamillu kalaallimik producentimik ataatsimik peqataaffigineqartoq.

*Imm. 2.* Filmiliaoqatigiilluni - koproduktion - filmiliaq isigineqarsinnaavoq kalaallit suliaattut aallaavigalugu kalaallit aamma nunani allamiut aningaasaliinerisa imminnut naapertuunnerat filmiliornermilu kalaallit sunniuteqassusiat, aamma eqqumiitsuliornerup teknikkimullu tunngasut illugiissillugit naapertuunneri aallaavigalugit.

## **Kapitali 2**

### *Kalaallit Nunaanni Filminstitutti*

#### *Instituttip siunertaa*

**§ 5.** Kalaallit Nunaanni Filminstituttip siunertaraa:

- 1) siuarsassallugu filmiliortarneq, filmertarnerup kulturua aamma nunatsinni filmertarfeqarnermi kulturi,
- 2) ingerlatsisuussalluni nunami tamarmi filmertarnermut kommissionitut, tak imm. 3,
- 3) siuarsassallugu kalaallit aamma nunani allamiut filmiliaasa nunatsinni ilisimaneqarnerat,
- 4) siuarsassallugu kalaallit filmiliaasa nunani allani ilisimaneqarlutillu nioqputigineqartarnissaat,
- 5) katersussallugit filminut tv-mullu atatillugu allaaserisat naqitertitallu, katersallu tamakku inuit tamat atorsinnaasaannik saqqumitinneqarnissaat,
- 6) isumagissallugu siammasissumik isiginnaartartunut sammisunik filmit pillugit ingerlatsisoqartarnissaa,
- 7) qularnaassallugu ingerlaavartumik filmiliornermik inuussutissarsiortullu oqaloqatigiinneq, tamatumani ilanngullugit Kalaallit Nunaanni Filminstituttip atuisullu pingaarutillit peqatigiinnissaat,

8) paasissutissiisassalluni ilitsersuillunilu meeqqanut inuusuttunullu filmit naleqquttut pillugit, tamatumanisaaq filmit pineqartut meeqqanut inuusuttunullu akornutaasinnaaneri, aamma

9) siuarsassallugit professionaliusumik filmiliorluni eqqumiitsuliornerup ilaatut piginnaasanillu ineriartortitsivittut ingerlanneqarnera, filmiliornermut ingerlatsivik aqqutigalugu.

*Imm. 2.* Kalaallit Nunaanni Filminstituttip ilanngullugit suliassarai

1) aningaasaliissutinik tapiissuteqartarnikkut tapersersussallugit allaatigisaq filmiliornermi najoqqutassaliornermi, ineriartortitsineq, nioqqutissiorneq, saqqummiisarneq, ussassaarisarneq, ilisarititsisarneq, filmertitsisarneq nassiussuisarnerlu kalaallit filmiliaannik, aamma peqatigiinnikkut filmiliat, kiisalu ingerlatsisarnerit allat filmiliornermut, filmiliornerup kulturianut aamma nunatsinni filmerarfeqarnermik kulturimik siuarsaasut, aamma

2) sularisassallugit Kalaallit Nunaanni filmiliorniarluni qinnuteqaatit, paasissutissanillu qitiusunik nalunaarsuisarneq filmilianik suliniutinut tunngasut, taakkualu akisussaaffigalugit.

*Imm. 3.* Filmkommissionitut ingerlatsinerup ilaapput atortorissaarusuisarneq aamma nunani allamiunik filmiliornerup tv-kkullu aallakaatitassiornerup Kalaallit Nunaannut soqutiginnilersitsisarneq, aamma kalaallini filmiliornerup tv-kkullu aallakaatitassiornerup atortulersuuteqarnissaat.

### *Aaqqissuussineq aamma aqutsisut*

§ 6. Kalaallit Nunaanni Filminstitutti tassaavoq pisortat ingerlatsiviat namminersortoq.

§ 7. Kalaallit Nunaanni Filminstitutti aqunneqarpoq siulersuisunit 5-inik ilaasortalinnit, ataatsimut tamarmik filmiliornerup tunngasunik ilisimasaqarluartunik, aamma tusagassiornermik ingerlatsinerup, ussassaarisarnermik, suliffeqarfimmik ingerlatsinerup, aningaasaqarnermik aqutsinermillu ilisimasaqarluartunik.

*Imm. 2.* Siulersuisuni ilaasortat tamarmik ataasiakkaarlutik siuliani pineqartut ilaannik arlaqartunillu sinneri ilisimasaqartuussapput.

*Imm. 3.* Siulersuisut siulittaasuat aqutsinerup aamma inuusutissarsiornermit misilittagaqartuussaaq.

*Imm. 4.* Kalaallit Nunaanni Filminstituttimi sulisut sinneri sumik toqqaassapput, siulersuisuni ataatsimiinnermi qinerseqataasinnaangitsutut peqataasussamik. Sulisut, ukiumut sularisinnaasaasa naatsorsorneranni ukiup affaani sinnerlugulu sinneri sulisimasut, qinerneqarsinnaallutillu qinersinnaapput.

§ 8. Naalakkersuisut inassuteqaatitaqanngitsumik siulersuisuni siulittaasumik toqqaasarput. Siulersuisuni ilaasortat sinneri imatut toqqaarneqartassapput:

1) Ilaasortaqaq ataaseq Film.gl -imit inassuteqaat naapertorlugu.

2) Ilaasortaqaq ataaseq Kalaallit Nunaanni Eqqumiitsuliornerup Aningaasaateqarfimmit inassuteqaat naapertorlugu.

- 3) Ilaasortaq ataaseq isiginnaartitsisartut peqatigiiffianiit SILA-mit inassuteqarnikkut.
- 4) Ilaasortaq ataaseq Sulisitsisunit NUSUKA-miillu ataatsimut inassuteqarnikkut.

*Imm. 2.* Inassuteqaataasut naapertorlugit siulersuisuni ilaasortanngortut akornannit siulersuisut siulittaasup tullissaa qinertassavaat.

**§ 9.** Siulersuisuni ilaasortat Kalaallit Nunaanni najugaqartuussapput, 18-inik ukioqalereersimassallutik, Inatsisartuni, Folketingimi imaluunniit kommunalbestyrelsimi ilaasortaassanatik. Naalackersuisuni ilaasortat aamma siulersuisuni ilaasortaasinnaanngillat.

*Imm. 2.* Kalaallit Nunaanni Filminstituttimi pisortaq siulersuisunut qinerneqarsinnaanngillat.

**§ 10.** Siulersuisunut ilaasortanut tamanut, siulittaasoq pinnagu ilaasortamut sinniisussamik inuttut toqqakkamik toqqaasoqareertassaaq, siulersuisuni ilaasortanngorsinnaasumik siulersuisuni ilaasortaq pineqartoq tunuassagaluarpat, tunuartinneqassagaluarpat sivisunerusumilluunniit pisinnaassanngikkaluarpat. Sinniisussat § 7, imm. 2 aamma § 9-mi piumasagaatinik naammassinnissimassapput.

*Imm. 2.* Sinniisussatut qinerneqarsimasoq aalajangersimasumik siulersuisui ilaasortanngorpat sinniisussamik nutaamik toqqaasoqassaaq. Siulittaasup tunuarneratigut imaluunniit tunuartinneqarneratigut Naalackersuisut siulittaasumik nutaamik toqqaassapput.

**§ 11.** Siulersuisuni ilaasortat ukiunut sisamanut ilaasortassatut toqqarneqartassapput.

*Imm. 2.* Taamaallaat siulersuisuni ilaasortamik siornatigut toqqarneqareersimasumik toqqaannartumik ataasiarluni toqqaaqqittoqarsinnaavoq.

*Imm. 3.* Naalackersuisut siulersuisunut ilaasortamik imaluunniit sinniisussamik tunuartsisinnaapput, taanna siulersuisuni ilaasortatut akisussaaffimmik annertuutigit sanioqqutsisimappat imaluunniit allanik pissuteqartumik siulersuisuni ilaasortaasinnaasutut piukkunnarunnaarsimappat.

**§ 12.** Siulersuisut suleriaasissartik namminneq aalajangersassavaat.

*Imm. 2.* Suleriaaseq malittarisassanik makkuninnga imaqassaaq:

- 1) siulersuisut instituttimilu pisortap akornanni akisussaaffiit agguataarneqarnerat,
- 2) ataatsimiittarnerit ingerlanneqartarnissaat aamma ataatsimeeriaaseq,
- 3) taasisarnernut malittarisassat,
- 4) aalajangeeqataasinnaannginneq,
- 5) nipangiusimannittussaaneq aamma
- 6) imaqarniliortarneq.

**§ 13.** Siulersuisunut ilaasortat suliainnut ukiumoortunik honorarisiaqassapput. Honorarisinermi kingumoortumik akilerneqartassapput ukiumut qaammatini 12-ni. Sulisut sinnerlugit siulersuisuni aalajangiisinnaanani peqataasusaaq honorarisiaqartassanngilaq.

*Imm. 2.* Siulersuisuni ilaasortatut qaammatip ingerlanerani ilaasortanngornermi honorarit ukiumoortumik pissarsiassat 1/365 -iattut ullormut naatsorsorneqassapput. Tamanna aamma atuuppoq siulersuisuni ilaasortamut qaammatip ingerlanerani tunuartumut.

*Imm. 3.* Honorarisianut aningaasartuutit Kalaallit Nunaanni Filminstituttimit akilerneqassapput.

*Imm. 4.* Naalackersuisut malittarisassiussapput siulersuisut honorarisiaat pillugit, tamatumani aamma taakkua annertussusissaannik akilerneqartarnerannillu.

**§ 14.** Aningaasartuutit, matumani aamma angalanernut, nerisaqarnernut najugaqarnernullu Kalaallit Nunaanni Filminstituttimik sullissinermut atasunik siulersuisuni ilaasortanut akilerneqartassapput, Kalaallit Nunaanni Namminersorlutik Oqartussani tjenestemandinut atuuttut malittarisassat naapertorlugit. Aningaasartuutit tamakkua Kalaallit Nunaanni Filminstituttimit akilerneqassapput.

**§ 15.** Siulersuisut Kalaallit Nunaanni Filminstituttimi qullersaallutik oqartussaapput, akisussaallutillu instituttip ingerlanneqarneranut, matumani aamma aningaasaliissutinik atuinernut aamma aalajangersaasarnernut instituttip anguniagaanik.

*Imm. 2.* Siulersuisut pingaarnertut akisussaaffigaat aalajangersakkat Kalaallit Nunaanni filminstituttimut tunngasut malinneqarnissaannut, aamma instituttip ingerlatsinerata inatsisit aalajangersarneqarsimasut naapertorlugit ingerlanneqarnerat.

**§ 16.** Kalaallit Nunaanni Filminstituttimi ulluinnarni ingerlatsineq isumagineqassaaq pisortamit siulersuisunit atorfinitsinneqartumit.

*Imm. 2.* Pisortaq siulersuisunut akisussaavoq inatsisini aningaasaqarnikkullu killiliussat iluanni Kalaallit Nunaanni Filminstituttimut atugassarititaasut naapertorlugit ingerlanneqarnerannut.

*Imm. 3.* Pisortap atorfinitsittarlugillu soraarsittarpai Kalaallit Nunaanni Filminstituttimi sulisut.

**§ 17.** Kalaallit Nunaanni Filminstitutti sulisunik atorfinitsitsisarnerni aamma soraarsitsisarnerni atorfeqarnermilu atugassarititaasuni allani pisussaavoq Namminersorlutik Oqartussani sulisunut malittarisassanik malinninnissamut.

### **Kapitali 3**

#### *Aningaasatigut tapiissuteqartarneq*

**§ 18.** Ukiumoortumik aningaasanut inatsisikkut aalajangersaasoqartassaaq immikkut nioqqutissiornermut atorneqartussanik, filmilianut isiginnaagassianut aamma naatsunut dokumentaaritullu filmilianut, kiisalu immikkoortunik aningaasaliissutinik Kalaallit Nunaanni Filminstituttimut tapiissutigineqartussanik.

*Imm. 2.* Tapiissutissanik tunniussaqaarnissamut atatillugu atugassarititaasunik aalajangersaasoqarsinnaavoq.

**§ 19.** Kalaallit Nunaanni Filminstituttip aningaasaliissutissanik qinnuteqaatinik allaatigisaq filmiliornermi najoqqutassaliornermut aamma filmiliatut nioqqutissiassatut siunnersuutigineqartunut, aamma naatsunik dokumentaarinillu filmiliassatut siunnersuutigineqartunik suliaqarnermi qularnaartassavaa eqqumiitsuliatut sulianik naliliisoqartarnissaa, aamma qinnuteqaatit aningaasaqarnikkut aamma nioqqutissiornikkut teknikkimut tunngasutigut nalilersuivigineqartarnissaat.

**§ 20.** Kalaallit Nunaanni Filminstitutti aningaasanut inatsimmi aningaasaliissutitut aalajangersarneqareersut iluanni Kalaallit Nunaanni filmilianut aningaasartuutaasimasut 25 %-iinik utertitsisinnaavoq, tamatumunnga atugassatut malittarisassiaasut iluanni, tak. § 21.

*Imm. 2.* Aningaasanut inatsimmi aalajangersaasoqassaaq filmiikkaartunik tapiissutigineqartut qaffasinnerpaaffigisinnaasaannik aamma appasinnerpaaffigisinnaasaannik.

**§ 21.** Naalakkersuisut malittarisassiussapput aningaasanik tapiissuteqartarnermut aamma aningaasartuutunik matussusiisarnernut filmiliornermut atasuni, tamatumani aamma tapiissutit siunertaannik, tapiissutit annertussusiannik, akilerneqartarnerannik aamma allaffissornermut tunngasuni.

*Imm. 2.* Malittarisassat, tak. imm. 1, aamma ilaqarsinnaapput malittarisassanik pisuni immikkut ittuni § 20-imi aalajangersarneqartunik procentiliussanik aamma qaffasinnerpaaffissanik appasinnerpaaffissanillu malitassanik saneqquטיםinnaanernut, aningaasanut inatsimmi aalajangersarneqarsimasunik filmiliornermut aningaasartuutaasimasunik, tak. § 20, aalajangersarneqartunik.

**§ 22.** Kommunit ikiorsiisarsinnaapput tapiissuteqarnikkut, attartortitsinikkut imaluunniit qularnaveeqqusiinikkut filmiliornermut, filmimik attartortitsinissamut aamma filmertitsisarnermut.

*Imm. 2.* Naalakkersuisut ersarinnerusunik malittarisassiorsinnaapput kommunit tapiissuteqartarnerannut, attartortitsisarnerannut aamma qularnaveeqqusiisarnerannut filmiliornermut, filmimik attartortitsinissamut aamma filmertitsisarnernik ingerlatsisarnermut atasuni.

#### **Kapitali 4**

*Aningaasalersuineq, aningaasartuutissanik missingersuusi, naatsorsuutit, kukkuniisuineq aamma aningaasaliissutininik utertitsisarneq*

**§ 23.** Kalaallit Nunaanni Filminstitutti aningaasalersorneqassaaq nunatta karsianiit tapiissutitsigut, taamaattoq tak. imm. 2 aamma 3.

*Imm. 2.* Kalaallit Nunaanni Filminstitutti tunissuteqarfigineqarsinnaavoq kingornussanik aamma tunissutininik allanik kiisalu tapiissutissanik aamma sponsoritut tunniussanik nunatta karsiata avataaneersuniit.

*Imm. 3.* Kalaallit Nunaanni Filminstitutti suliniutinik aningaasarsiornikkut isertitsiniutaasunik aamma tapiissuteqarfigineqartarnernik aqqissuussinernik ingerlatsisinnaavoq.

*Imm. 4.* Kalaallit Nunaanni Filminstituttip tapiissutigineqartut aamma isertitat allat namminerisaminik atorsinnaavai, kisiannili atugassarititaasut aalajangersarneqarsimasut aamma missingersuusiordermi malittarisassat malinneqassapput.

**§ 24.** Kalaallit Nunaanni Filminstituttimi siulersuisut ukiut tamaasa Naalakkersuisunut ukiumut tulliuuttumut aningaasartuutissatut missingersuusianik siunnersuuteqartassapput, piffissap Naalakkersuisut aalajangigaata iluani. Siunnersuut imaqartassaaq missingersuusianik isertinneqartussatut aamma aningaasartuutaasussatut naatsorsuutigineqartunik.

**§ 25.** Kalaallit Nunaanni Filminstituttimi ukioq naatsorsuusiorderfiusartoq tassaavoq aningaasanut inatsisip ukiuat.

*Imm. 2.* Instituttip malitarissavai Namminersorlutik Oqartussani piffissami sumiluunniit atuuttut aalajangersakkat missingersuusiordernermut, naatsorsuusiordernermut aamma naatsorsuutinik suliaasimasunik saqqummiussisarnermut.

**§ 26.** Kalaallit Nunaanni Filminstituttip ukiumoortumik naatsorsuutai Namminersorlutik Oqartussat kukkunersiuisunit kukkunersiorneqartassapput.

*Imm. 2.* Siulersuisut saqqummiussisassapput naatsorsuutinik ukiumoortunik kukkunersiuisut oqaaseqaataannik imaqartunik akuerisaasunillu Naalakkersuisunit piffissaliussaasup iluani Naalakkersuisunut akuerineqartussanngorlugit. Naalakkersuisut tamatuma kingornagut ukiumoortumik naatsorsuutit Inatsisartunut ilisimatitsissutitut nassiuttassavaat.

*Imm. 3.* Naatsorsuutit Naalakkersuisunit akuerineqareeraangata naatsorsuutit akuerineqarsimasut siulersuisunit tamanut takusassiarineqartassapput.

**§ 27.** Siulersuisut ukiumoortumik Kalaallit Nunaanni Filminstituttip ingerlatsisimanerat pillugu Naalakkersuisunut nalunaarusiortassapput. Nalunaarusiaq instituttip quppersagaani tamanut saqqummiunneqartassaaq.

*Imm. 2.* Siulersuisut ukiumoortumik nalunaarusiaminni nassuiaateqarfigisassavaat aningaasaliissutinik ikiorsiissutaasimasut, nalunaarsorlugit pissutsit tulliuuttuniittut:

- 1) Tapiissutit agguaanneqartut siunertakkaartunik immikkoortitikkat.
- 2) Nalunaarlugu kina tapiiffigineqarsimanersoq, siunertaq suunersoq aningaasallu annertussusiat.
- 3) Nalunaarsorlugit tapiiffigineqartuni kikkut siusinnerusukku instituttimiit tapiiffigineqareersimanersut.
- 4) Nalunaarsorlugit itigartinneqartut, taakkunanilu kikkut siusinnerusukku instituttimiit itigartinneqareersimaneri.

*Imm. 3.* Nalunaarusiamilu aamma nassuiaateqarfigineqassapput Kalaallit Nunaanni filminstituttimi aningaasaqarnikkut aamma sulisoqarnikkut pissutsit atuuttut, aamma instituttip inatsit naapertorlugit siunertaasunik naammassinninneri qanoq innersut.

**§ 28.** Tapiissutunik tunineqarsimasut Inatsisartut inatsisaat naapertorlugu, imaluunniit Inatsisartut inatsisaannik tunngaveqartumik malittarisassiat naapertorlugit tunniunneqartut pillugit naatsorsuusiussapput.

*Imm. 2.* Naalackersuisut malittarisassiorsinnaapput naatsorsuusiortarnermut, matumani aamma kukkunersuisarnermut piumasaqaatit pillugit.

**§ 29.** Tapiissutit aningaasaliissutigineqarsimasut tamakkiisumik imaluunniit ilaannakuusumik utertinneqarnissaannik piumasaqartoqarsinnaavoq, qinnuteqarsimasoq eqqunngitsunik paasissutissiisimappat, tapiissuteqarnissamut piumasaqaataasut naammassineqarsimanngippata, imaluunniit tapiissutigineqartut tapiissuteqarnermi siunertat sanioqqullugit atorineqarsimappata.

*Imm. 2.* Naalackersuisut malittarisassiorsinnaapput tapiissutigineqarsimasut atorunnaartarnerinut aamma utertinneqartarnerinut.

## **Kapitali 5**

### *Akuersissuteqartarneq aamma nalunaarsuisarneq*

**§ 30.** Kikkut tamarmik aningaasarsiutigalugu Kalaallit Nunaanni filmiliorinissaminnik kissaateqartut Kalaallit Nunaanni Filminstituttimut qinnuteqaateqartassapput tamanna pillugu, tamatumunngalu atatillugu akitsuummik akiliuteqartassallutik qinnuteqaammik allaffissornikkut suliaqarnermut akuersissuteqarnissamillu aningaasartuutinut matussutaasussanik. Tamannali tusagassiorluni suliaqarnermut atasuni atuutinngilaq.

*Imm. 2.* Kalaallit Nunaanni filmiliorumalluni qinnuteqaateqartarneq pillugu, matumani ilanngullugu immikkut pisoqartillugu akuersissutit pillugit piumasaqaatinik sanequtsisinnaaneq, qinnuteqaatip ilusissaanut, qinnuteqarnissamut piffissaliussanik aamma akiliutip akilernerqartussap annertussusissaanik Naalackersuisut ersarinnerusunik malittarisassiussapput.

**§ 31.** Kalaallit Nunaanni Filminstituttip Kalaallit Nunaanni filmiliorinissamut akuersissummik suliaqarnermut atatillugu nalunaarsortassavai paasissutissat suliamut attuumassuteqartut pingaarnerit, aamma tamatumunnga akisussaasut.

*Imm. 2.* Kalaallit Nunaanni Filminstituttip quppersakkamini tamanut takusassiarisassavai paasissutissat akuersissutunik tunniussaqaqarnernut tunngasut tamaasa.

*Imm. 3.* Naalackersuisut ersarinnerusunik malittarisassiussapput imm. 1-imi pineqartunik nalunaarsuisarnermut atatillugu, aamma paasissutissat pineqartut sorliit imm. 2 naapertorlugu tamanut takusassiarineqartassanersut pillugit.

## **Kapitali 6**

### *Nakutilliineq aamma naammagittaalliutit*



**§ 32.** Naalackersuisut Kalaallit Nunaanni Filminstituttip Inatsisartut inatsisaanik tunngaveqartunik ingerlatsineranik nakkutilliisuupput.

*Imm. 2.* Naalackersuisut Kalaallit Nunaanni Filminstituttimut piumasarisinnaavaat paasissutissat pisariaqartut nakkutilliinermi Inatsisartut inatsisaannik tunngaveqartunut atasut.

**§ 33.** Aalajangiinerit Kalaallit Nunaanni Filminstituttip aalajangiisarnerinut tunngasut allaffissornikkut oqartussanut allanut naammagittaalliutigeqqinneqarsinnaangillat, taamaattoq takuuk imm. 2.

*Imm. 2.* Inatsisinut tunngasut pillugit aalajangiinerit Naalackersuisunut ingerlatsinneqarsinnaapput kingusinnerpaamik aalajangiisoqarneraniit sap. ak. 4-at qaangiutsinnagit.

*Imm. 3.* Naalackersuisut malittarisassiorsinnaapput naammagittaalliortarnernut, naammagittaalliutinillu suliaqartarnernut.

## **Kapitali 7**

### *Pineqaatissiissutit*

**§ 34.** § 30, imm. 1, oqaaseqatigiinnik siullernik unioqquitsisoq, Kalaallit Nunaanni Filmiliornermut Ilisimatusarfimmit akuersissummit peqarani aningaasarsiornissaq siunertaralugu filmiliorluni Kalaallit Nunaanni Pinerluttulerineq pillugu inatsimmi malittarisassat malillugit akiligassinneqarneratigut pineqaatissinneqarsinnaavoq.

*Imm. 2.* Inatsisartut inatsisaannik tunngaveqartunik malittarisassiani pineqaatissiissuteqartoqarsinnaavoq akiliisitsinikkut Kalaallit Nunaanni pinerluttulerinermut inatsit naapertorlugu.

*Imm. 3.* Inatsisartut inatsisaanni imaluunniit malittarisassiani Inatsisartut inatsisaannik tunngaveqartuni akitsuummik akiliisitsisoqarnissaanut pinsinnaatitsiviusuni akiliisitsissutaasussaq inatsisit naapertorlugit inummut Kalaallit Nunaanni pinerluttulerinermut inatsimmi malittarisassanik tunngavilimmik akiliisitsisoqarsinnaavoq.

*Imm. 4.* Akiliisitsissutit Inatsisartut inatsisaannik matuminnga tunngaveqartut, imaluunniit malittarisassanik inatsimmik tunngavilimmik pineqaatissiissutigineqartut nunatta karsianut nakkartinneqartassapput.

## **Kapitali 8**

### *Atortuulerfia aamma ikaarsaariarnermut aalajangersakkat*

**§ 35.** Inatsisartut inatsisaat atortuulerpoq ulloq 1. januar 2025.

*Imm. 2.* Siullermeertumik Kalaallit Nunaanni Filminstituttimi siulersuisuni ilaasortassanik toqqaaneq, tak. § 11, imm. 1, Inatsisartut inatsisaata atortuulernerata kingornagut pissaag piffissamut 1. april 2025 -imiit 31. marts 2029 ilanngullugu atuuttumik.

*Imm. 3.* Kalaallit Nunaanni Filminstitutti pillugu malittarisassat aatsaat atortuulissapput instituttip pilersinneqarneranit, taamaattoq siusinnerpaamik ulloq 1. januar 2026 aallarnerfigalugu.

*Namminersorlutik Oqartussat, ulloq xx. xxx 2024*

**Naalakkersuisut Siulittaasuat**